

Nunat Avannarliit Killiit Siunnersuisoqatigiiffiata aalajangersagaa nr. 1/2009 Inatsisartunit taparserneqarnissaa pillugu Inatsisartut aalajangiiffisassaattut siunnersuut, aalajangersagaq ima oqaasertaqarpoq:

Nunani pingasuusuni ilinniagaqartut avitseqatigiittarnissaat siunertaralugu ilinniarnertuunngorniarfiit (akunnattumik sivisussusilimmik ilinniartitaanerit) akornanni suleqatigiinnermik aallartitsinissamik Savalimmiuni Naalakkersuisut, Kalaallit Nunaanni Naalakkersuisut Islandillu Naalakkersuisui suliniuteqaqqullugit Nunat Avannarliit Killiit Siunnersuisoqatigiiffiannit kaammattorneqarput. Aammattaaq suliniummut atatillugu aningaasartuutit matussutissaannik aningaasanik immikkoortitseqqullugit nunat naalakkersuisui kaammattorneqarput.

Aallartitat siulittaasuannit Josef Motzfeldtimut saqqummiunneqartoq

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

ISUMALIUTISSIISSUTAA

Siunnersuutip aappassaaneernejarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Harald Bianco, Inuit Ataqatigiit, siulittaasoq
 Andreas Uldum, Demokraatit, siulittaasup tullia
 Juliani Henningsen, Inuit Ataqatigiit
 Doris Jakobsen, Siumut
 Ruth Heilmann, Siumut

UKA2010-mi ulloq 12. oktober 2010-mi siullermeerinerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Ilinniarnertuunngorniarfinni atuartut paarlaateqatigiittarnissaasa suleqatigiissutiginerat aallartinneqassasoq savalimmiormiut, islandimiut kalaallillu naalakkersuisuinut siunnersuutikkut aalajangersarneqarpoq. Ilinniarnertuunngorniarfittut pineqartut tassaapput ilinniarnertuunngorniarfiit, niuerneramik ilinniariit, tekniske skolit, lærlinginut ilinniariit assigisaallu. Inuusuttut akornanni kulturiikkut paarlaateqatigiinnerusalernissaq siunnersuummi siunniunneqarpoq. Suliniummi aningaasartuutit matussusernissaannut siunertamut atugassanik naalakkersuisut pineqartut aningaasanik illuar-titsissasut siunnersuummi kaammattuutigineqarpoq.

Inatsisartut siunnersuummik siullermeerinninnerat

Siunnersuut partiit akornannit tapersorsorluarneqarpoq.

Ataatsimiititaliap siunnersuummik suliarinninnera

Ilinniarfinni ilinniarnissamut inerisaqqinnissamullu periarfissaqartitsiuarnissamik siunertaq ataatsimiititaliap tapersorsorpaa. Nunarput nunarsuarmi tamarmi inuiaqatigiinnut ilaavoq inuusuttullu nunanut tamanut tunngatillugu akuunissamut piareersarneqarnissaat pingaaruteqarpoq. Allamiut kulturi oqaasiilu paasisimasaqarfigilersinnissaat paasitinnissaallu tamatumunnga iliuuserisinnaasat ilagaat tamannami aqcutigalugu nammineq kulturerisq itinerusumik paasineqarsinnaammat.

Kalaallit Nunaanni, Islandimi Savalimmiunilu ilinniarnertuunngorniarnissamik neqerorutit sanillunneqarsinnaasutut siunnersuummi oqaatigineqarnerat ataatsimiititaliap tusaatissatut tiguaa. Ilinniarnissamik neqeroorutit naleqqussartuarnissaat ilinniagaqartut ilinniakkatigut annertuallaanik assigiinngissuteqannginnissaat ilinniaqatiminnillu ajornerusumik inissisimalinnginnissaat pingaaruteqarluinnarpoq. Aamma taamaappoq ilinniagallip ilinniakkami ilaa nunami allami ingerlattariaqarpagu kingornalu nammineq ilinniarfimminut utertussaattillugu.

Nunanut allanut paarlaateqatigiittarneq nammineq piumassuseq tunngavigalugu pisassasoq naatsorsuutigineqarpoq. Nunat allamiut kulturiat oqaatsillu allat ilinniarnissaannut ilinniartoq ilisimasaqalersinnaassaaq misilittaqalersinnaallunilu. Ilinniartut ilaannut atatillugu nunat allamiut oqaasii akimmisaarutaasinnaapput taamaalillutillu paarlaateqatigiittarneq pillugu iluatsiffiusumik suleqatigiinissamut unamminartutut suliassaqqissuulluni. Islandip savalimmiullu naalackersuisunik suleqateqarneq Naalackersuisut aallartippassuk paarlaateqigiittut ataasiakkaat oqaatsinik akimmisaarutaat sutigut assigiinngitsutigut annikinnerpaatinniarnissaat peqqissaartumik isummerfigineqartariaqarpoq.

Nunami allami paarlaateqatigiiffiusumi ilinniartut ilaqutariinni najugaqartarnissaat siunnersuummi siunnersuutigineqarpoq nunami pineqartumi pissutsit sapinngisamik annertuumik paasisimasaqarfigilernissaat anguniarlugu. Nunamut allamut aallarluni ilinniariarneq alloriarneq annertuujusinnaavoq. Nunami ornitami ilaqutariinni najugaqarneq ilinniartunut ataasiakkaanut toqqissisimanarnerusinnaavoq. Ilinniagaqartut allatut ineqartitaanissaminnut ilaatigut sapiissuseqarsinnaassapput, asser-suutigalugu ilinniartut najugaqarfiini. Ilinniartunik paarlaateqatigiissitsisalernissaanik suleqatigiittoqalernissaanut pisariaqartitat assigiinngitsut eqqarsaatigineqartariaqarput.

Ilinniarnermik ilaata nunani allani ingerlannissaanut periarfissamik inuusuttut amerlanerusut neqeroorfigineqarnissaat sulissutigineqarmat ataatsimut isigalugu ataatsimiititaliap pitsaasutut isigaa. Aalajangersakkami matumani pineqartut taamaallaat tassaapput Nunani Avannarlerni Killerni ilinniarnertuunngorniarniarfiit. Ataatsimiititaliamilli aamma kissaatiginartinneqarpoq isittumi naggueqatitta ilinniartitsinerup iluani suleqatigineqalernissaannut periarfissat misissorneqarnissaat, matumuunakkullu Naalackersuisut ataatsimiititaliamit kaammattorneqarput tamanna sulissutigeqqullugu.


Siunnersuutip aningaasatigut kingunerisassai

Angalanerni unnuinernilu aningaasartuutit amerlanerulersinnaanerat siunnersuutikkut naatsorsuutigineqarmat ataatsimiititaliap maluginiarpa, ilinniagaqarnersianulli atuartinneqarnermullu aningaasartuutit allannguuteqassanngitsut naatsorsuutigineqarluni. Saniatigut aningasartuutit siuliani pineqartut Kalaallit Nunaanni, Danmarkimi Nunanilu Avannarlerni ilinniarnertuunngorniat ilinniagaqarnersiaqartitaanerisa iluanni akilerneqarsinnaanissaat Naalakkersuisut innersuussutigaat. Taamaalilluni siunnersuut aningaasatigut kinguneqassanngitsoq naatsorsuutigineqarpoq.

Ataatsimiititaliap inassuteqaatai

Siuliani oqaaseqaatit siullermeerinermilu oqaatigineqartut tunngavigalugit **ataatsimiititaliap isumaqatigiittup** siunnersuut **akuerineqassasoq** inassutigaa.


Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappassaaniigassanngortippaa.



Harald Bianco



Andreas Uldum



Ruth Heilmann



Juliane Henningsen



Doris Jakobsen